

Nostalgia pa tempo bunita di Sport Park na San Nicolas

Fin di e siman aki mi tabata na San Nicolas y tabata conversa cu un "veterano" di Village, dilanti Joe Laveist Sport Park. Recuerdonan di tempo di school a bin dilanti, tempo cu a traha Pastoor Hendrikstraat; tempo cu a pone luz den Lago Sport Park; Lago Sport Park cu su bar y speeltuín, competencianan deportivo den Lago Sport Park y asina por a sigui. Di lamenta ta cu e aña aki ta net **65 aña pasa cu Lago Sport Park a wordo inaugura.**

Tabata dia **9 di maart 1941** y esaki combina cu un desfile di cu a sali for di dilanti porta grandi di entrada di Lago na Lagoweg, te Lago Sport Park, cu musica di "**brassband**", (no brassband di carnaval conoci awe, pero mas bien e bandanan estilo marching band) sigui pa deportistanan cu cargamento di bandera, y cu centenares di hende canto di e ruta, mirando e espectáculo, y mas di 3000 den Lago Sport Park, tanto den tribuna como rond di tereno di wega, segun anotacionnan cu mi tin di publicacionnan di e tempo ey.

E parada tabata bao di guia di polis riba motocicleta, cu cargadornan di bandera, mariniernan, e banda musical y equiponan deportivo di nos isla bisti den nan uniform. Na entrada di Lago Sport Park a hisa e bandera tricolor hulandes, y tambe e bandera di Esso.

PREMIO PA PALO DI SEBA A WORDO HORTA

Un parada casi similar tabata tuma lugar anualmente pa celebracion di aña di la Reina dia **30 di augustus** den cayanan di Oranjestad terminando dilanti oficina di Gehebbber unda discurso ta tuma lugar.

E paradanan aki tabata tin ademas di organizacionnan deportivo, tambe participacion di e diferente colonianan cu nan respectivo bandera, y di diferente organizacion social.

Den Lago Sport Park **30 di augustus 1941** a tene e prome "**Carnaval**" atletico cu participacion di 130 atleta y cu a bira e evento deportivo di mas grandi cu Aruba a conoce.

Cuater ora largo e publico por a goza di competencia di pustamento di burico, pustamento cu bicicleta, atletismo, coremento den saco; bulamento leu, rancamento di cabuya etc.

Bulamento halto no a sigui debi na falta di tempo.

Tiramento di bala di cricket tampoco a sigui pa motibo cu e publico tabata asina cerca di tereno cu esaki lo a bira peligroso. E otro evento cu no a tuma lugar e dia ey, cual lo mester tabata e prome competencia oficial "**habri**" tabata e subimento di pal'i seba.

No pa motibo di peliger of pa falta di tempo.

E competencia di subimento di pal'i seba a keda cancela pa motibo cu varios persona cu kier a experimenta na subi e palo aki, a kita tur e grease cu e palo tabata hunta cune, prome cu e competencia por a tuma lugar.

Ademas di esey, un of otro persona a baha na awa cu e premio cu e campeon mester a gana, pasobra e premio aki tabata instala riba e parti mas halto di e palo.

NOSTALGIA PA E AMBIENTE DI AYERA

Esnan cu awe drenta Joe Laveist Sport Park, ta haya nostalgia. Nan ta haya e falta di e ambiente dushi di Lago Sport Park. Na entrada caba via porta grandi, cu bo ta topa cu e bar y cushina grandi y pariba di dje e edificio di deposito cu despues a bira un oficina, y pabo di dje e speeltuín.

E speeltuín aki tabata tin e "**glider**" di mas grandi cu Aruba a conoce di un speeltuín.

Mester menciona si cu ta varios mucha a cay di esaki kibranan, of pia pero mas leu lesionnan no a bay nunca.

Tabata tin cantidad di schommel, pa muchanan di diferente edad, di manera cu bo ta laga bo yiu usa e schommel cu ta pas pa su edad y grandura.

Varios wip, y tambe "**merry go round**" (cabayito sin cabay) tabata tin pa muchanan chiquito y esnan mas grandi.

No tabata tin un dia cu e speeltuín no tabata yen di mucha hungando.

Panort di e speeltuín tabata tin e canchanan di tennis y basketball den cual tenistanan y deportistanan di basketball mundialmente famoso a hunga.

PASTOOR HENDRIKSTRAAT CONSTRUI

Mey mey di decada 50 a cumenza construi Pastoor Hendrikstraat.

Pa lunanan largo ningun auto por a pasa den cercania di Abraham de Veerschool, Don Bosco School, Augustinus College y bin abao te Filomena College y sigui bay abao pa Pieterboerschool, normalmente.

Masha hopi paña di school a bay perdi, pasobra ta tur dia muchanan tabata susha paña hungando den santo blanco y buscando cocolishi di tur sorto y di color cu por a haya den e santo cu tabata basha pa e construccin.

Mas pariba pabao di chickenfarm tabata tin cas di familia Nicolas y familia Geerman cu nan dilanti e cas di Simon Hoftijzer.

E meneer Simon aki, ta un di e prome personanan cu mi a conoce, cu a yega di para gobierno.

Pa nada e no a permiti pa su cas wordo basha abao pa e caminda wordo construi.

E caminda mester a pasa net unda e cas ta.

El a para fuerte contra gobierno, cu finalmente mester a baha cabez y construi pe un cas poco mas panort, ora cu finalmente a yega na un acuerdo.

Esaki ta e cas cu a bira oficina di OLA pinta cu dak blauw y despues a bira un fruteria.

E Simon cu muchanan di school tabata tenta, a logra haya admiracion di e mes muchanan ora cu nan a ser conta di e lucha di Simon contra gobierno.

Tabata no mucho aña despues cu Pastoor Hendrikstraat a keda construi, cu Lago Sport park a haya su postenan di luz, locual tambe a paraliza deporte riba tereno di futbol y baseball, pa varios luna.

Esaki tambe, pa muchanan di Augustinus College, net pariba di Lago Sport Park y cu awe ta Paulus School, yega cas tur atardi cu paña tur na lodo, pero esey ta otro historia.

Juby Naar.

Boek prome cu
4 di Augustus!

Disney

Ultimo Chance

pa Herfst Vakantie

Afl. 2,151.00 pa persona / basa ariba 4 persona

Prijs ta inclui

- *Ticket cu American Airlines
- *Tur Tickets pa Walt Disney
- *8 Anochi na All Star Movie Resort
- *Transfers y Shopping Tour

100 YEARS OF MAGIC

Maduro Travel (Aruba) Inc.
travel@selmaduro.com
528-2332 / 587-0625 / 584-6624 / 582-4863



KEEP YOUR BEST MOMENTS ON
DVD
WEDDINGS, EVENTS, BIRTHDAYS,
GRADUATIONS, SOCIAL EVENTS
AND ALL OTHER MOMENTS
CALL FOR APPOINTMENT
PHONE: 733-9813
FAX: 582-4210

**TELEFONNAN
DI DIARIO**
582-6747
FAX
582-8551